

## CAPUT XXIV.

## REMEDIA IMPATIENTIÆ.

Multa sunt negotia et officia, quæ aggredi et quibus fungi oportet; multa hominum consortia, quibus cogimur interesse: vixque fieri potest, ut omnia ex animi nostri sententia eveniant, et omnes nobiscum consentiant. Idcirco summâ curâ advertendum, ne animi excussa tranquillitate in impatientiam labamur. Id autem assequemur, præparato et præmunito animo earum rerum consideratione, quæ in singulis negotiis, officiis, et congressibus contingere solent, nec possunt à nobis immutari, aut impediri. Nam si dura quæque, injucunda, et molesta, quæ res ferè singulas concomitantur, antea prævisa fuerint, et ad illa æquo animo ferenda parati simus, omnem facile commotionem et mentis ægritudinem evitabimus. Hoc præcipuum opus est, cui sedulò incumbere oportet, ut rebus scilicet exterioribus, prout exigit earum natura, utamur. Illarum autem natura fert, ut nobis serviant, non dominentur; ut multis casibus obnoxiae et extra nostram potestatem sint: et ideo virum sapientem suique propositi tenacem, de solido mentis statu nunquam dejiciunt. Si quis eum abducatur, si facultates eripiant, si dignitate privet, si tormentorum, vel mortis metum incutiat, non vincitur, non cedit, non læditur, quia dudum cogitavit, et didicit hæc omnia extra se esse. Opiniones

perturbant hominem, non res. Nemo angitur, nemo luget, nemo tremit, nemo expavescit, nisi qui appetit, aut timet aliquid, quod penes ipsum non est. Martyres Christi diversis tormentorum generibus dilacerati inter fatigatos carnifices invictam animi patientiam constantissimè tenuerunt: ipsis quoque pueris, ac mulieribus nec flagella, nec succensæ fornaces gemitus exprimere potuerunt. Verberari poterant, et occidi, non vinci: nam quæ tyranni dare poterant, vel auferre, ipsi spernebant, ut potè extra se posita. Virtutem verò animi nemo illis eripere potuit, quia extra regum et tyrannorum potestatem est.

## CAPUT XXV.

## PROPRIA CHRISTIANORUM VIRTUS HUMILITAS.

Clamat verbum Dei, fons Sapientiæ, clamat omnium virtutum magister et auctor, et dicit, *discite à me* (1). Magnum aliquid audituri sumus; quis est enim qui dicit, *discite à me?* Ille est qui fecit coolum et terram, qui omnia produxit è nihilo, qui dixit de tenebris lucem splendescere. Numquid docebit nos hæc eadem facere, et novum mundum creare? sed solus Deus hæc facit. Dicit ergo, ut ab illo discamus quod ipse propter nos homo factus est, *qui cum in forma Dei esset... semetipsum exinanivit formam servi accipiens, in similitudinem hominum factus,*

(1) Matth., xi, 29.

*et habitu inventus ut homo* (1). Discite, inquit, à me non mortuos suscitare, non dæmones expellere, non leprosos mundare, non cœcis lumen, surdis auditum reddere, non sicco vestigio pelagi undas calcare, sicut quidam fecerunt, quibus hanc gratiam donavi; sed, *discite à me quia mitis sum, et humiliis corde.* Noluit docere quod ipse non esset, noluit jubere quod ipse non faceret. Ad hoc redigit omnes thesauros scientiæ et sapientiæ suæ, ut disceremus ab ipso humiles esse. Adeo res magna est et difficilis humilem esse, ut omnino disci non posset, nisi ab illo qui maximus est. Non enim posset humana superbia tumore deposito humili fieri, nisi ab illo sanaretur, qui, cùm Deus esset, *humiliavit semetipsum factus obediens usque ad mortem, mortem autem crucis* (2). Est igitur humilitas propria, et præcipua Christianorum virtus, superbis Philosophis ignota, quam præ cæteris Christus docuit verbo et exemplo, ut in novitate vitæ ambulantes ad præmium supernæ vocationis post ipsum properemus, sedulò considerantes unde peregrinemur, quò tendamus, quantum viæ egerimus, quibus præsidii ad iter peragendum muniti simus. Nisi enim humilitas omnia quæcumque facimus et præcesserit, et comitetur, et subsequatur, nunquam ad optatam metam perveniemus. Nobis quippe de aliquo bono opere gaudentibus, quidquid egimus inficit superbia, quæ etiam in rectè factis timenda est, ne quod laudabiliter operamur, ipsius laudis cupiditate amittatur. Quod si aliquando cogitationes nostræ nos aliquid esse sug-

(1) Philip., II, 6.

(2) Ibid., II, 8.

gesserint, terra semper præsens est, quæ primæ nostræ originis nos admonet. Terra sumus, et mox in terram revertemur. Super hoc fundamento reliquarum virtutum ædificium construendum est: nam si quis gratiam miraculorum habeat, ita ut montes transferat; si variis linguis loquatur, si dono prophetiæ prædictus sit, si omnes infideles ad Deum converterit, si omnes facultates suas egenis distribuerit, in maximo periculo labendi jugiter erit, extorquentे illi superbiam, quidquid laudabiliter fecit, nisi conscientius infirmitatis suæ imminentem sibi ruinam semper timeat, et de se diffidens salutem suam cum timore et tremore operetur. Vera Christianorum sapientia hæc est, ut discant humiles esse.

## CAPUT XXVI.

HOMO PER SUPERBIAM A DEO RECESSIT, ET AD ILLUM PER HUMILITATEM REDIRE DEBET.

Superbia vitium præ cæteris execrabile et noxiū ab Angelo tunc originem sumpsit, cùm aduersus Deum elatus ad se ipsum eo deserto conversus est bona sibi insolenter arrogans, quæ à creatore accepérat, ac si ipse sibi illorum fons et auctor foret. Illius enim sunt apud Isaïam apostatica illa, et intolerabile fastum indicantia verba, *In cælum cōscendam, super astra Dei exaltabo solium meum... ascendam super altitudinem nubium, similis ero Altissimo* (1). Idem et in homine contigit, qui serpen-

(1) Isai., XIV, 13.

tis dolo deceptus conditori suo æqualis esse concupivit, tanquam hoc haberet simile Deo, ut non nisi de propriis dives esset. Ideo scriptum est, *initium superbiae hominis, apostatare à Deo : quoniam ab eo, qui fecit illum, recessit cor ejus* (1), et in sublimitate constitutus horribiliter dejectus est. *Initium* igitur *omnis peccati*, ut eadem scriptura testatur, *est superbia* (2), quam veluti hæreditario jure à primo parente omnes accepimus, propriam excellentiam veluti scopum in omni actu, et cogitatione spectantes, à Deo aversi, et ad nos ipsos conversi, ut ergo ad illum revertamur, à quo per superbiam recessimus, contrariâ viâ humilitatis incedendum est. Basis verò seu fundamentum, super quod humilitas exstruitur, propriæ fragilitatis et miseriae cognitio est, ut nimirum quisque cognoscat, et fateatur se nihil habere, nihil posse, nihil esse, nihil sibi deberi. Deus enim primi hominis corpus è limo terræ formavit, cui animam infudit è nihilo creatam, sui capacem, et præclarissimis gratiæ donis decoratam, quibus superveniente peccato spoliata, maculâ infecta est naturæ viribus indelibili. Pristino autem decori per gratiam Christi redemptoris restituta, rursum propriâ voluntate à justitia recedens deformis facta est, et Deo odibilis: et sic utique permaneret, nisi respi ciens desuper Pater misericordiarum illam iterum à servitute peccati ereptam, in libertatem et pulchritudinem filiorum Dei vindicaret. Surgere verò post lapsum nemo potest, nisi qui profitetur Divini munera esse quòd surgit. Quis enim de massâ perditio-

(1) Eccl., I, x, 14.

(2) Ibid., x, 15.

nis discernit hominem, ut eum faciat vas in honorem, nisi gratia Dei per Jesum Christum? Quod si quis inaniter inflatus dicat, discernit me fides mea, discernit me oratio mea, discernit me justitia mea: occurrit Apostolus hæc dicenti, et ait, *Quid autem habes quod non acceperisti? Si autem acceperisti, quid gloriaris quasi non acceperis* (1)? Idem quoque dicit, *Non quod sufficientes simus cogitare aliquid à nobis, quasi ex nobis : sed sufficientia nostra ex Deo est* (2). Denique Redemptor noster ait: *Sine me nihil potestis facere* (3), ut non gloriatur omnis caro in conspectu ejus, sed quemadmodum scriptum est, *Qui gloriatur, in Domino gloriatur* (4). Non enim gloriari possunt peccatores, qui non habent unde gloriantur: neque justi, quia gloriam non habent, nisi in illo, cui concinunt, *Gloria mea, et exaltans caput meum* (5). Sed numquid aliquis fortè gloriabitur, quod Dei beneficia non rejecerit? Hoc profectò extremae dementiae foret, ac si quis jactaret se, quod, cùm posset miser esse, et se in puteum præcipitem dare, id tamen non fecit. At istud etiam divinæ misericordiæ fuit, quæ si lucem, et opem suam subtraheret, nec ejus dona agnoscere, nec iis uti possemus. Superanda igitur cupiditas gloriæ, dilectione justitiæ, adeò ut in his, quæ rectè facimus, amor humanæ laudis cedat amori veritatis. In nullo enim gloriandum, quandoquidem nostrum

(1) I. Cor., iv, 7.

(2) II. Cor., iii, 5.

(3) Joan., xv, 6.

(4) I. Cor., i, 31.

(5) Ps., iii, 4.

nihil est. Et hoc est fundamentum omnium virtutum, scire et credere, quod ex nobis ipsis nihil possumus, nihil sumus, nihil habemus. Deus enim est, qui operatur in nobis et velle et perficere; atque ideo timendum ne gratia Dei, quæ datur humili, auferatur superbo.

## CAPUT XXVII.

## CHARACTER SUPERBII.

Superbia quædam elatio est, per quam homo ultra modulum suum extendit se, et sibi jactanter attribuit, quæ sua non sunt. Tum sui figuram et ideam, quam ipse pulcherrimam, et altissimam concepit in aliorum mentibus imprimere ntitur, genus suum jactans, et dignitates, animique ac corporis dotes, quibus se super cæteros extollit, ac si potentia et magnitudine omnibus antecellat. Altiores autem assumit spiritus et arrogantiam, si his accedat servorum multitudo, pretiosa supellex, vestium luxus, gemmarum fulgor, ædium magnificentia et apparatus, pecunia in multos annos reposita, et alia ejusdem generis multa, quæ jactantiae fomentum præbent, et insolentiae pabulum subministrant. Ideo magnificos optat titulos, populique plausum et laudes, tanquam indicium quod super alios emineat; et de his gloriatur, in his quiescit veluti in summo vitæ hujus bono, de æterna vita nihil sollicitus: Hinc oritur odium, quo quisque aversatur quidquid ipsum deprimit, et reliquis inferiorem os-

tendit. Hinc fastidium, et mœror, cum in aliqua re quis deprehenditur, quæ propriam excellentiam minuere videatur. Hinc timor continuus, et omnium fere hominum anxietas timentium, ne opera quæ aggre- diuntur infelicem exitum sortiantur: omnes enim videri volunt et laudari, nec immunes ab hoc morbo sunt infirmæ plebis homines sordidas et despici- tissimas artes exercentes, nam et proferunt se, et cupiunt ob artis suæ peritiam inter cæteros ejusdem sortis eminere. Ipsimet Philosophi, qui de contem- nendâ gloriâ multa præclarè scripserunt, effugere superbiam non potuerunt, quam maximè detestati sunt, gloriam re ipsâ quærentes, quam verbis dam- narunt. Occultè siquidem serpit hoc virus, et avul- sâ pessimæ arboris radice, adhuc remanent subtilissimæ quædam fibræ, quæ vix à sanctissimis viris deprehendi queunt. Ejus itaque motus accuratissimè observare ac Dei timore comprimere oportet, et magis veritate quâm falsis hominum laudibus delectari. Fumus è fornace erumpens in altum elevatur, et ingenti globo intumescens splendidissimum solis jubar obnubilat; sed quia caret soliditate, statim in auram dilabitur, et evanescit. Ita superbii, qui se inaniter extollunt nullo virtutum fundamento solidati, quantò amplius erigunt se, et in majorem ambitum diffundi satagunt, tantò exiliores fuent, ac citius deficiunt et non ap- parent. Vidi impium superexaltatum, et elevatum sicut cedros Libani. Et transivi, et ecce non erat (1).

(1) Ps., xxxvi, 35.

## CAPUT XXVIII.

## INCITAMENTA HUMILITATIS.

Depravatæ naturæ pondere undique impellimur, et in lubrico positi, stabili gressu stare non possumus, nisi dextera Domini teneat nos. Si à gravibus flagitiis abstinemus, hoc Dei ope fit, omnem peccandi occasionem misericorditer subtrahentis, alioquin experientia magistrâ jam didicimus, quales simus in proximo labendi periculo constituti. Si quid boni in nobis est, id valde exiguum, et imperfектum est, cumque bonum sit ex integra causa absque ulla mali admistione, quis certò asserere audebit, se aliquod opus aliquandò fecisse, quod ex integro bonum fuerit, et gratum Deo, et non potius innumeris imperfectionibus permistum? Quis tam sollicitè salutem suam quærit, aut tanto ardore perfectioni incubbit, sicut filii hujus saeculi opes quærunt et dignitates? Certi quoque sumus, nos gravissima commisso peccata, de quorum remissione incerti, nescimus utrum amare digni simus vel odio: et si speramus veniam à Deo obtinuisse, de dono tamen perseverantiae securi non sumus, sed omnia in futurum reservantur incerta. Quis verò hæc perpendens gloriari potuerit, aut aliiquid sibi tanquam proprium usurpare, et in se fiduciam habere? imò quis non timebit? quis non palam et ex corde profilebitur se nihil esse, nihil posse? Sicut aër recedente sole ob-

curus fit et tenebrosus, ita anima, Deo lucem et opem subtrahente, nihil videt, nihil potest. Hanc veritatem si quis plenè intellexerit, ab aliis item cognosci optabit: cumque verè, et ex animo se omni contemptu et abominatione dignum aestimaverit, ab aliis quoque despici, et pro nihilo haberi desiderabit; nam si secùs faceret, cognitæ veritati repugnaret. Veritas humilitatis cōmēs individua est, et quò magis anima in veritatis cognitione proficit, eò clarius videt se nihil esse et nihil posse.

## CAPUT XXIX.

## NIHIL BONI ESSE IN HOMINE, QUI CARET HUMILITATE.

A quolibet lapsu facile quisque surgeret, si statim à medico remedium peteret. Sed plerique superbì adeò obsecinati sunt, ut morbum suum vel non cognoscant, vel propriis viribus se curaturos putent. Hæc ratio est, ob quam qui ceciderunt non resurgent, et in sordibus suis contabescunt, quia ad Deum non confugiunt, nec pendent ab ejus gratia sicut oportet; sed sibi de se suarum ægritudinum remedium, rejecto medico, pollicentur; ex quo fit ut ipsa medicina morbus sit. Nullus autem mortalium eo infelior, qui cùm cæcus sit, putat, se omnia clare videre? nam cùm alterius opem non querat, nullum est præcipitum, in quod labi non possit. Vetus illa sententia, *Nosce te ipsum*, quæ de cœlo descendisse dicitur, admonet hominem, ut cognoscat

se nihil ex se, in Deo autem omnia posse. Ideo multi despondent animum jacentes in languoribus suis, quia adjutorium Dei non implorant, nec in illo sperant, de quo dixit Apostolus, *Omnia possum in eo qui me confortat* (1), de quo etiam Psalmista cecinuit, *in Deo meo transgrediar murum* (2). Non est vera humilitas, quae magnanima non est, et ad sublimia non assurgit, illius ope freta, qui pro nobis factus est homo, ut nos Divinæ naturæ consortes facheret. Sicut ferrum ignitum non est ignis, sed ardet ex igne, qui in ipso est: ita homo ardere dicitur non ex se, sed ex amore sibi Divinitus collato, qui in ipso est: et lucere dicitur non ex se, sed ex lumine sapientiæ, et veritatis, quo à Patre lumen imbutus est. Sicut etiam instrumentum non propria virtute, sed per manum artificis operatur: ita homo dicitur operari, Deo per illum omnia operante, qui dat omnibus velle, et perficere, et omnia opera nostra operatur in nobis. Quod si amor, sapientia, et lux ab homine recesserint, illum protinus invadent frigus iners, profunda ignorantia, et caligo tenebrosa: eritque inutilis, et ad omnem usum ineptus veluti instrumentum sine artifice. Cùm igitur homo ex se nihil sit, nihil valeat, nihil habeat, in nihilo suo tanquam in centro commorari debet, omnia enim in Deo poterit, cùm se nihil esse, nihil posse cognoverit.

(1) Philip., iv, 13.

(2) Ps., xvii, 30.

## CAPUT XXX.

QUI VERE EST HUMILIS SIBI IPSI INTENTUS, ALIOS NON  
JUDICAT.

Humilitas est virtus, quâ homo verissimâ sui agnitione sibi ipsi vilescit. Examen autem sui ipsius sibi hominem prodit: etenim aperitur conscientiæ liber, revolvitur misera vitæ series, illuminatur ratio, et cogitur anima coram se constituta proprio tribunali assistere à semetipsâ judicanda. Quod si ita se judicaverit, non utique judicabitur. Væ animæ, quæ in mirabilibus super se inaniter elevata, et ad exteriora effusa damna sua interiora non sentit. Ideo prævaricatores hortatur Scriptura redire ad cor (1), ut quidquid intus latet, curiosè explorent, et agnoscentes miseriam suam, ab aliorum censura abstineant. Plerique tamen hoc negligunt, et quod miserabile ac nunquam satis deplorandum est, cum miserrimi sint, ac densâ caligine adeò circumfusi, ut propria vitia, et peccata perspicere nequeant; aliorum nihilominus vel exiguae imperfectiones subtilissime investigant, et acutissimè deprehendunt. Hæc nimur imperfectorum proprietas est, ut cum se ipsos nullo modo cognoscant, in arguendis aliorum vitiis continuò occupentur. At qui se intus cognoscere satagunt, quo magis in sui cognitione proficiunt, eò se imperfectiores fatentur, quoniam

(1) Isai., xlvi, 8.

majori luce perfusi clariū vident, quām longē absint à vera sanctitate et perfectione. Propterea ad alios non respiciunt, nisi eis ex officio incumbat, satis negotii habentes in suis imperfectionibus emendandis. Vera Sanctorum disciplina hæc est, zelum erga se ipsum exercere, et peccantes patienter ferre: indicium enim magnæ imperfectionis est, imperfectos ferre non posse. Sicut Deus in ordine naturæ ex nihilo omnia creavit, ita etiam in ordine gratiæ omnem ornatum virtutum producit ex nihilo, ex anima scilicet, quæ se nihil esse intimè credit, et profiteatur. Solida virtus illa est, quæ derisionibus, contemptu, injuriis, et continuā humilitatis exercitatione probatur. Hæc deficiente, quidquid virtutis in aliquo apparet, non virtus est, sed illusio et hypocrisis, ac inane virtutis simulacrum. In ventum pulverem portat, qui sine humilitate virtutes congregat.

## CAPUT XXXI.

## VERI HUMILIS DESCRIPTIO.

Verè humilis censeri debet, qui omni exaltatione superior est, et omni abjectione inferior: qui in excelso loco positus, delatis sibi honoribus et laudibus non extollitur: et ad infima projectus nunquam tanto contemptu, confusione, et ignominia affici potest, quin sibi persuadeat se multo deteriora mereri. Verè item humilis est, qui pro nihilo haberiri.

cupit: qui non humilis, sed vilis in aliorum opinione esse desiderat, ita ut omnes credant patienter ab illo adversa tolerari non ex virtute, sed ex necessitate, quia nimur ea evitare, vel impedire non potest. Si ipsum contingat in aliquo verbo vel opere labi, veniam petere ab his, qui præsentes fuerunt, non erubescit, si præsertim aut mendacium protulerit, aut de aliquo perperam pro humana fragilitate locutus sit: qua in re speciem quamdam martyrii esse vir magnus edocuit. Simili modo si aliquid dixerit vel fecerit, ex quo ejus existimatio lädatur, de hoc quidem dolet quatenus offensa Dei est, gaudet autem de confusione, et contemptu sibi ex eo proveniente, cuius occasiones pacato animo amplectitur, nihil tamen scienter admittens, quo contemptibilis fiat. Si verba ejus innocenter prolata in sensum perversum trahantur: si illi, quos amat, in quibus confidit, in quos beneficia contulit, ipsum improbent, et persequantur, ejusque consortium fugiant: et si post multos labores non solùm nullam mercedem recipiat, sed potius opprobriis afficiatur, nullo modo conqueritur, quia opera sua nihili aestimat, suique contemptum avidius complectitur, quām reliqui omnes honorem et gloriam. Ab omnibus derelictus confugit ad Deum, in quo reperit omne gaudium, et omne bonum. Quæcunque ad se pertinent, silentio premit, ad omne dedecus et ignominiam animo paratus, tamquam mortuus, et sepultus cujus non extat memoria. Non majoribus tantum et æqualibus, sed etiam inferioribus se subjicit, quoad actus interiores semper, quoad exteriores attentis circumstantiis, et salvâ dignitate. Firmiter credit, se om-

nium hominum nequissimum esse , quia mala sua aliorum bonis comparat : tum seipsum considerat secundūm ea quā ex se habet, alios verō ex donis Dei. Latere optat, omniumque fabula et ludus esse : nec solū omni honore, et commodo ; sed ipso etiam cibo et potu, hominumque cōsortio se indignum putat : et si fortē aliis praeferatur, pavet, confunditur, contristatur, se ineptum reputans, ac cujuscumque muneris incapacem. Hæc est imago veri humilis, rudi penicillo expressa, ex qua poterit omnis Christianus perspicere, quām procul absit ab hac virtute , quam sectatoribus suis Christus tanto-perè commendavit, factus pro nobis opprobrium hominum , et abjectio plebis. In hujus autem virtutis exercitatione nullum est periculum, si quis se minorem aestimet, quām revera sit. Grande verō malum horrendumque discriminem est, si se plus justo extollat, aut majorem putet, quām re ipsā sit. Sicut intrans per ostium, cuius superliminare demissum sit ; si se nimis inclinaverit nihil ei nocebit, sed si se vel transversi digiti spatio, plus quām ostii mensura patitur, exerit, impinget et quassato capite collidetur : ita animæ non nocet quantavis depresso, maximam autem perniciem illi afferet quæcunque vel minima exaltatio. Quare nemini non dico præponere, sed nec quidem se componere debet, qui vult omne periculum superbiæ evitare. Sic Christum Dominum imitabimur, qui cū Filius Dei esset, formam servi accepit, ut formam nobis traderet humanitatis.

## CAPUT XXXII.

OPORTERE HUMANAM VOLUNTATEM DIVINÆ SUBDITAM, ET CONFORMEM ESSE.

Nullum donum gratius Deo, nullum sublimius sacrificium , quām seipsum Divinæ voluntati integrè in omnibus subjecere et conformare : nihil enim aliud excelsa illa Majestas requirit ab homine , nisi ut se exhibeat hostiam viventem , sanctam, acceptabilem, quam si quis ritè obtulerit, piè et religiose litavit. In hac siquidem conformitate et submissione non bona exteriora , non rem aliquam singularem ; sed propriam voluntatem, proprium iudicium , totumque hominem perfecto holocausto immolamus , nullā re exceptā , nullis præscriptis limitibus. Quoties ergo aliquid nostri in nobis est, toties à nobis exire, et nos deserere debemus, donec solus Deus in nobis sit, et ad omnia quā de nobis æterna sua providentia decreverit, parati, et indifferentes inveniamur. Non enim perficiet in nobis Deus beneplacitum suum, quamdiū aliquid erit in nobis, quod illi repugnet, et contrarium sit. Integrum cor ille postulat, et qui se totum ei non dat, nihil dat. Conceditur quidem humanæ fragilitati aliquid proprium velle, sed statim elevari supra se debet, et illi adhærere qui super omnes dominatur. Ille creator est , nos creaturæ : ille Dominus , nos servi : ille omnipotens, nos infirmi. Nostram itaque voluntatem corrigeremus, et illius nos voluntati sub-

dere debemus dicentes, *non sicut ego volo, sed sicut tu* (1). Verba Christi Domini hæc sunt orantis ad Patrem, et transfigurantis nos in se, ut discamus ab illo nihil velle nisi quod Deus vult. Alioquin quid potuit Christus velle diversum à voluntate Patris? Quorum una est Divinitas, dispar nequit esse voluntas. Quamobrem docuit nos orare, *Fiat voluntas tua, sicut in cœlo, et in terra* (2). Sicut Angeli faciunt voluntatem tuam, facimus et nos obtemperantes præceptis tuis. Faciunt homines voluntatem suam, non Dei, quando faciunt quod volunt, non quod jubet Deus. Tollatur à nobis rixa illa, quam describit Apostolus dicens, *Caro enim concupiscit adversus spiritum: spiritus autem adversus carnem* (3). Sic fiet voluntas Dei consentientibus simul carne et mente; ita ut nulla remaneant desideria carnalia, cum quibus mens confligat: nihil sit in corpore quod spiritui resistat; omnisque concupiscentia in charitatem commutata fuerit: hæc est enim voluntas Dei sanctificatio nostra. Unus est Deus, et qui adhæret illi, unus spiritus est, una voluntas.

(1) Matth., xxvi, 39.

(2) Ibid., vi, 10.

(3) Gal., v, 17.

## CAPUT XXXIII.

## OMNIA DE MANU DEI ACCIPIENDA.

In hoc summa totius Perfectionis consistit, ut quidquid acciderit, pacato animo de manu Dei accipiamus, omnem sollicitudinem projicientes in eum, quoniam ipsi cura est de nobis (1). Omnia, quæ mundus mala vocat, peccato excepto, quod est solum et verum malum, à Deo esse Scriptura testatur, dicens, *Bona et mala, vita et mors, paupertas et honestas à Deo sunt* (2). Et alio loco: *Ego Dominus, et non est alter, formans lucem, et creans tenebras, faciens pacem, et creans malum: Ego Dominus faciens omnia hæc* (3). Cùm igitur Dei nutu, et secretissimi consilii sui immutabili dispositione apud ipsum fixa sint omnia, quæcumque fiunt in orbe terrarum; æquum est, ut universa quæ accidunt quantumvis dura et acerba, veluti singulare erga nos benevolentiae signa, de manu ejus acceptemus, ipsius providentiae inhærentes non nostræ, quæ semper timida et incerta est, Deique operationem in nobis destruit. Calumniæ, fraudes, furtæ, raptus, insidiaæ, bella, cædes, morbi, ruinæ, pestilentiae, sterilitates, et aliæ quælibet calamitates, sive publicæ, sive privatæ, ad improborum emendanda, vel castiganda flagitia, et ad justorum

(1) I. Petr., v, 7.

(2) Eccli., I. xi, 14.

(3) Isai., xlvi, 6.

exercitationem à Deo permittuntur, et immittuntur, et si quid horum nos vexat, assumenda vox est patientissimi Prophetæ, qui omnium malorum genere cruciatus dicebat: *Dominus dedit, Dominus abstulit: sicut Domino placuit, ita factum est: sit nomen Domini benedictum* (1). Servis fidelibus, quæcunque agenda sunt, ita committunt Domini, ut eos tamen nescire velint, quis finis sit, quæ series, et ratio consiliorum suorum: sic nos subjecti erimus Divinæ providentiae tamquam inutiles, et obsequentes servi, nihil solliciti quid de nobis, quid de aliis fieri velit, idque nobis à Domino dici putabimus, quod olim Petro dixit, *Quid ad te? tu me sequere* (2). Et si aliquando bona opera, quæ aggressi sumus, vel ægreditur, vel quâlibet adversitate impediti contigerit, non contristabimur: scit enim Deus, quid nobis magis expediat. Sic perpetuâ pace, et imperturbabili tranquillitate fruemur, clamaente veritate cunctis perturbationibus, ne ad locum appropinquent, in quo Deus pacis commoratur,

---

### CAPUT XXXIV.

#### DIVINÆ PROVIDENTIE IN OMNIBUS ACQUIESCENDUM.

Bonum est optare à Deo affligi, et multa pro eo pati, sed multò melius est, ipsius dispositioni et

(1) Job., i, 21.

(2) Joan., xxi, 22.

beneplacito in omnibus acquiescere, et orare, ut nos ducat quò ipse vult. Vita naturalis motu et sensu se prodit, vita supernaturalis omnis motus et sensus cessatione, et defectione. Qui enim se deserit, omnesque motus animi sui in Deum transfert, is vitâ gratiæ vivit, et à se ipso ita est expeditus, ac si de se nihil sciret, velut infans, cuius est unius diei vita super terram. Quidquid sibi acciderit, non in se respicit, sed in Divina voluntate et providentia. Nihil ex hoc sæculo sibi applicat, nisi quod vult Deus, in cujus manu tamquam instrumentum est, artificis arbitrio ad quocumque opus applicandum. In divinis consiliis perscrutandis curiosus non est, sed illa humiliter adorat, firmiter credens ea semper justa esse, licet sâpè occulta sint. Idem vult quod Deus vult, eodemque modo, atque eamdem ob causam, propter quam ille vult. Suam voluntatem Divinæ conformat, quoad omnia bona naturæ, gratiæ et gloriae; ita ut suis actibus, et suâ libertate, quantum fieri potest, spoliat se, ut sola Dei voluntas in ipso vivat et operetur. Cùm enim voluntas corruptæ naturæ vitio se plurimum amet, et in suis actibus veluti possessione delectetur, tametsi unicam Dei gloriam quærat, eam tamen actu proprio vult, et in eo complacet sibi tamquam in proprio bono: ex quo fit, ut, si ipsum propriæ voluntatis actum et gaudium, quod ex eo provenit, sibi prorsus adimat, tunc verè et perfectè Divino beneplacito acquiescere censenda sit, suamque voluntatem in Divinam purissimè transfundere, cum omnimodâ sui ipsius, et omnium creaturarum oblivious. Voluntas Dei necesse est ut fiat; omnia enim quæcunque voluit Dominus fecit,

et non est qui possit resistere voluntati ejus : tunc autem optimè fit, cùm in nobis, et à nobis fit.

### CAPUT XXXV.

SOLUM DEI BENEPLACITUM OPTANDUM EST.

In voluntate Dei pax et tranquillitas constituenda est. Si peccavimus, si alios ad peccandum induxi-  
mus, si ex flagitiis nostris multa mala secuta sunt : dolendum sanè est, et fletibus eluenda sunt crimina,  
ac digna castigatione plectenda : animi verò per-  
turbatio et inquietudo evitanda, et cum pace emen-  
dationi incumbendum, imploratà Dei misericordiā,  
que nos labi permisit, ut discamus non altum sapere, sed timere : neque nostrum putemus esse quod  
Dei est. Ab ipso veniam, et indulgentiam in spiritu  
humilitatis, et in animo contrito expectabimus, sicut  
servus adventum Domini sui patientissimè præsto-  
latur. Dominus enim est, veniet quando voluerit.  
Fidelis servus, et prudens nihil querit, nihil optat,  
nisi Domini beneplacitum, et in omni eventu ex intimo cordis affectu ait, *Ita Pater : quoniam sic fuit placitum ante te* (1). *Fiat voluntas tua* (2). Ad omnem nutum tuum paratus sum. Vis me incolarem esse, vis ægrotare? Vis me dulcedine tuâ perfrui, vis in tenebris et continuâ ariditate versari?  
Vis me abundare; vis penuriam pati? Id volo quod tu vis, fac de me quod tibi placet. Hæc animi præ-

(1) Matth., xi, 26.

(2) Ibid., vi, 10.

paratio omnino indifferentis ad quæcumque Deus vult, hominem facit ad omnia mala impavidum, et inconcussum, omnique adversitate superiorem, relictâ sui rerumque omnium sollicitudine et anxietate. Nam si de cibo et vestimento, aliasque rebus ad vitam necessariis nos sollicitos esse Christus prohibuit, quantò magis superflua et inutilis cæterorum cura adjicienda est? Ipsa pax animi, si anxie queratur, amittitur: atque ideo sublati curis in sola Dei voluntate quiescendum. Curiositas, et inquisitio, quâ sœpè investigamus quid de nobis futurum sit, naturæ est seipsam amantis, et timentis aliquid pati. Optimè Deus ex altâ providentia suæ speculâ cuncta respiciens, quid unicuique conveniat, agnoscit, et suaviter ac fortiter disponens omnia, curam hominis singulariter suscipit, cùm illum videt omnem de se cogitationem in ipsum proje-  
cisse.

### CAPUT XXXVI.

SPES SALUTIS NOSTRÆ IN DEO PONENDA.

Vir Christianus sapientia imbutus non solum supernæ dispositioni, quæcumque pertinent ad temporalis vitæ subsidia, committit, de crastino non cogitans, sicut præcepit Christus; sed spem quoque salutis suæ in ejus voluntate reponit, qui nunquam deserit sperantes in se. In hac spe et conformitate voluntatis suæ cum divina, singulariter constitutus, salutem suam cum timore et tremore

operator, misericordiam, et judicium Domino suo fideliter concinens, in cuius arcana irrumpere, et in abyssum profundissimam judiciorum ejus descendere nimis temerarium foret. Certum quidem est, neminem posse in hac vita, absque speciali revelatione, æternæ salutis securitatem habere: sed absit ab homine Christiano hæc insania, ut de illa desperet. Hoc illorum est, qui obstinatissimâ voluntate in fæcibus suis computrescere, et in malis perseverare decreverunt. Qui verò meminit se Christi Sanguine redemptum, et Baptismatis Sacramento initiatum, de bonitate Dei non diffidit, ejusque auxilium indefessus implorat, tutum habens in eo refugium, qui veniam cum lacrymis postulanti, et peccata animo contrito detestanti nunquam negavit. Hæc sunt magna et saluberrima consilia Domini, exquisita in omnes voluntates ejus, atque adeò sapienter exquisita, ut electionem nostram occultam esse voluerit, ne securitas superbiam generet et negligentiam, qui se existimat stare, videat ne cadat (1). Quia verò electi pauci sunt, debet vir fidelis cum paucis sanctè vivere, ut certam faciat vocationem suam, et in fine cum paucis coronari mereatur. Angusta porta, et arcta via est, qua dicit ad vitam: et pauci sunt, qui inveniunt eam (2), ut Christus Redemptor noster nos docet. Ideò per arctam viam incendum est, semperque timendum, etiamsi bene currere videamur, quia de dono perseverantiae nemo securus est. Non tamen animum despondere oportet, sed spes in Deo ponenda,

(1) I. Cor., x, 12.

(2) Matth., viii, 14.

eiusque beneplacito voluntas nostra subjicienda est in tempore et in æternitate. At aliquis fortè dicit, incerta est mihi de me ipso voluntas Dei. Quid ergo? An tua voluntas de te ipso certa est? sanè non est. Quod si utraque incerta est, cur Divinæ potius voluntati, quam tuæ spem tuam non committis? Superbissimus et infelicissimus est, qui fiduciam habet in se, et non in Deo; ille autem beatus est, qui confidit in Domino, cuius firma promissio est, et in quo omnes qui speraverunt non sunt confusi.

## CAPUT XXXVII.

SPIRITUM, ET PERFECTIONEM CHRISTIANÆ RELIGIONIS IN CHARITATE CONSISTERE.

Quanvis per Fidem, et per Baptismum Christiani nuncupemur, et simus, sola tamen Charitas est, in qua spiritus et anima nostræ religionis consistit, et per quam Christianè vivere possumus. Sicut enim Deus propter nimiam charitatem suam, qua dilexit nos, Filium suum misit in mundum, ut nos redimeret Sanguine suo: ita nos debemus ipsum diligere toto corde, totis viribus, et proximum sicut nos ipsos. In hoc est Charitas, non quasi nos dilexerimus Deum, sed quoniam ipse prior dilexit nos, et misit Filium suum propitiationem pro peccatis nostris. Hoc autem est maximum, et primum mandatum, ex quo universa lex pendet et Prophetæ. Hoc Fidei nostræ fundamentum, scire et cognoscere